



De bello Melitenſi,
& eius euentu Fran-
cis impoſito, ad Ca-
rolũ Cæſarem V. Ni-
colai Villagagnonis
Commentarius.



P A R I S I I S,

Apud Carolum Stephanũ, Typographum Regium.

M. D. L I I I.



Cum priuilegio Regis.

PAR LETTRES PATENTES DV ROY, DON-
nees a saint Germain en Laye, le vingtsixieme iour de Februrier, mil cinq cens
cinquante deux, signees sur le repli, Par le Roy, maistre Iehan Danāson maistre
des Requestes ordinaire de l'hostel presens, Du Thier, & sceelles en cire iaulne
du grand seel dudit seigneur sur double queue, Il est permis & octroyé a
maistre Charles Estienne son imprimeur ordinaire, que nul autre que luy en ce
Royaulme, pays, terres & seigneurries dudit Seigneur, puisse imprimer ne faire
imprimer, vendre ne debiter ce present liure, intitulé, De bello Melitenensi, &
cius euentu Francis imposito, ad Carolum Cæsarem V. Nicolai Vil-
lagagnonis Commentarius, iusques apres six ans finiz & accompliz, a
compter du iour & date du paracheuement d'iceluy, sur peine de confiscation
de la chose, & d'amende arbitraire, applicable moitié audit Seigneur,
& moitié audit Estienne. A laquelle fin, ledict Seigneur a voulu & com-
mande, que ce qui aura ainsi esté & sera imprimé, contrefaict & mis en ven-
te, soit saisi & mis en sa main: & ceulx qui auront ce faict, adiournex par
deuant le Preuost de Paris, ou son Lieutenant, auquel de la certaine science, pro-
pre mouuement, plaine puissance & auctorité dudit seigneur, est mandé pro-
ceder a l'encontre des desobeissans sommairement & de plain, a la declaration
desdictes confiscation & amende arbitraire, sans ce qu'aucuns autres iuges en
puissent prendre Court, Iurisdiction, ne congnoissance: laquelle leur est du tout
interdict & defendue, Nonobstant quelconques establissement de Iurisdiction,
Edicts, Statuts & Ordonnances, ausquels il a plu audit Seigneur deroguer.



De bello Melitenſi, & eius euen

TV FRANCIS IMPOSITO, AD
Carolū Cæſarem V. Nicolai Villaga-
gnonis Commentarius.



ELLI à Turcharum prin-
cipe Melitenſibus Equiti-
bus illati, quis fuerit exitus,
ex multorum literis, Carole
Cæſar, cognouiſti. Sed
ad quem redeat arciū de-
ditarū infamia, qui ſcripſe-
re, tacuerunt: & naſti tem-
poris occaſionem, vbi vi-
derent tibi & Iulio Ponti-

fici cum Rege bellum eſſe, culpam amiſſæ Tripolis,
Legato oratori regio & Francis equitibus aſſignarūt:
detectus tamen paulò poſt dolus huc rem adduxit,
vt falſi damnatis ſcriptoribus, Franci omnium ſen-
tentiis in Equitum cōcione ſint abſoluti. Sed quum
mendacium in vulgus editum, per totam Europam
prius increbuiſſet, & hominū animos peruaſiſſet,
quàm abſolutionis teſtimonium emitteretur: effici
adhuc non potuit, vt ab errore auerterentur, qui ſe-
mel ad prægreſſam famam, de Frācis improbā opi-
nionem imbiberant. Id autem quàm ſit iniquum, &
ab ipſa re alienum, hic te docebit Commentarius.

A.ii.

Classē apud Turchas parari, & Melitenses designari, quū penē omnium sermonibus iactaretur: Ioannes Omedes Hispanus, Melitensis militiæ princeps, per homines idoneos hostiū iter explorādum esse putauit: vt vbi cōperisset, quam in partem classi contendēret, consiliū sibi caperet. Exploratores, dimissis ad eum nuntiis, Melitam peti, remque nullam amplius habere dubitationem, confirmabant. Quibus nuntiis Equites excitati, ab Omede postulāt, vt sibi rebūque suis maturē prospiciat: ne impulsu classi, inopinantes & imparati opprimantur. Omedes respondet, nulli hęc maiori esse curā, quā sibi: neque se virum existimari debere tam nullius vsus, vt quando res exigeret, esset defuturus. Nullam noctis partem intercedere, quū reliqui se quieti darent, quin subductis rationibus, anxie secum reputaret, quemadmodum rei frumētariæ, cæterisque necessariis, bene cautū & prouisum esset: sed hanc subesse difficultatem, quōd quū propter annonæ angustiam, à Prorege Sicilia, commeatu perexiguē leuaretur, ex vltioribus regionibus frumentum à se petitum, ærarium exhausserat, vt numorum inopia grauitè laboraret: cui malo vt mederetur, in se positum non esse. Alioqui de salute cōmuni quantum fuisset sollicitus, suam diligentiam in arce munienda esse testimonio: qua propē haberet effectum, vt opera, & munitiones institutæ, sola specie hostes à spe expugnationis deterrere possent: hoc, à se amplius requiri nihil oportere. Adiecit, ad eorum animos confirmandos, qui metu classi hostium com-

mouerentur, rem non eo positam loco, ac plerisque videretur: classē, multo longius, quā Melitam spectare: ea de re, scire se plus & intelligere, quā qui diuersum scripsissent. (Neque enim, qui rerum aliquem vsū habeat, in animum inducturum, vt credat spe Melitæ obtinendæ tantos sumptus factos esse.) Certò se accepisse, Franci classē esse destinātā, atque Tolonis expectari: Legatū oratorem regium quinque mulos Massiliam adduxisse, quibus stipendium Turchis attulisset: duas insuper triremes & biremem vnā adornari, quibus ad eos transfereheretur. hoc, equitis Franci ē Franciā aduecti indicio, tenere se: cui potius, quā hominum imperitorum vocibus, habenda fides esset. Eodem tempore nuntiatur, Villagagnonē Messanā appulsum, Melitam contendere: in cuius aduentum huius rei fides reiicitur. Vbi aduenit, magna omnium expectatione, ad Omedem deducitur, vt de classe quid afferret certi, intelligeretur. Hic interrogatus, apertè negat classē vsui Francorum, sed Solimani cupiditati apparatus esse: vt iniuriam, induciis ad Africanum oppidum violatis, acceptam vlcisceretur. Hoc, in Francia ante suā profectiōem, palām factum esse, à viro penes quem non parua est rerum auctoritas: eāque vnicā fuisse causā, cur, neglecta re familiari, missionem à Rege petiisset, ne tempore maximè difficili sodales deseruisse diceretur. Eo sermone confecto, habere se ab Anna Mommoratio, priuati officii mandata, commemorat. apud quem post Liladanni principatū, militiæ commoda præ-

cipuo commendationis loco semper fuerant . Is se ægerrimè laturum significabat, siquam Omedes honoris aut dignitatis iacturam faceret : Solimanum Equitibus valde succensere, propter operam Cæsari ad Africam nuper nauatam : neque vlla ratione deduci potuisse, quominus classẽ ad persequendas iniurias instrueret. A qua, Melitæ & Tripoli nonnihil extimescendum . proinde Omedes videret, ne quid aduersi imparato & incauto sibi contingeret. Omedes hoc responso Villagagnonem nimix secreti tenacitatis insinulat, quòd aperire noller quæ de Regis sui proposito intellexisset, classẽ Francorum rebus comparatam ad se properare . De se autem profitetur, operam daturum, ne sua diligentia requiratur . Prorex Siciliæ iisdem de rebus egerat Messanæ cum Villagagnone , atque in eadem erat cum Omede sententia : sed monitionibus concessit : atque adhibita celeritate, quum nulla veteranorum sibi facultas esset, pastorum & montanorum delectũ habere cœpit, quos Africam subsidio transmitteret. Simul, quòd certior factus erat Tripolim militum inopia consiliari, nullasque esse copias, quæ Melita eò traducerentur : delectorum numerum definitum ad Omedem misit, vt eis ad Tripolitanum præsidium vteretur . Addebat, maximè interest Reipub. Christianæ, militiæque Melitenfis, cum portũ seruari : ne amissus, ad receptum prædonibus pateret . Hoc nuntio, & Villagagnonis oratione Equites incitati, Omedem circumsistunt . Qui ad eum, propter dignitatem, sermonis aditũ habebant,

12
orabant vt opinione decederet, & priusquam tempore excluderetur, de omnibus rebus constitueret, quæ ad communem salutem pertinebant, ne sperneret Proregis auctoritatem & mandata: hunc enim tantos sumptus fecisse describendis & transmittendis militibus, argumenti loco sumi posse, classem Francos non petere. Quibus ostensis rebus, concilium indicitur. Ibi Omedes ab ultimo repetit, & longa narratione prosequitur, quæ antea de annonæ angustis exposuerat: re frumentaria se premi, militum perexiguas copias habere, æris nullam rationē. Atque hanc ipsam fuisse causam, cur è prouinciis Equites non euocasset. Inita ratione quemadmodū è tantis difficultatibus emergeret, hanc expeditissimam sibi visam, vt singulis militiæ possessionibus pecuniæ imperarentur: quod non est improbatum consilium, sed in suum tempus & opportunitatem referuatum: hoc autem reprehensum est, quòd præsentis periculi remedia in longinquum produceret. Hac ergo procuratione in suam occasionē reiecta, huic vni rei studendum esse demonstratur, vt ægritudini præsentis præsens medicina reperiatur: ne mora interiecta, ad extremum periculum agat imparatos. Adiungitur, tribus omnino locis rem Melitensium cladem aliquam accipere posse: quibus, quātum esset facultatis, danda erat opera ne grauius quicquam accideret. Quòd si ob tenuitatem, omnibus succurri non liceret: ea deferi oportere, quæ ab omni iniuria tuta esse non possent: & ex eorum copia, his quæ defendi placuisset, subuenire. De Gosira insula tracta-

tur, defendi libèret, an dimitti. Vna consensione decernitur, deserti oportere. Repugnat tamen Omedes: docet, castrum editissima rupe, asperrima & circuncisa situm esse: vt facile hostes aditu prohiberentur. eò insulanos se posse recipere, quos respectus patriæ, natorum & propinquorum charitas, ad extremum vitæ periculum, sedes tueri cogeret. Qui saepe cum Turchis patentibus & apertis locis congressi essent, victorèsq; semper euassissent, dubitari nò debere, quin naturâ loci subleuati, tectiq; munitionibus, illorum impetum sustinerent, & muris succedentes summoouerent. Horum virtuti se multû confidere, sed spem primam constituisse in eorum ducis equitis Hispani virtute & belli scientia: quibus rebus proclue est ad omnes casus subsidia comparare: ac iam vt hæc contra opinionem acciderent, & per infirmitatem hostibus resisti non posset, iudicii tamen sui non esse, protinus ad leuem auditionem, insulam relinqui: quòd absque magno municipum detrimento, suoque dedecore id fieri non posset. Quid enim, inquit, est leuius aut turpius, quàm ante visum periculum metu permoueri? Quid si (quod est magis probabile) hostes nò veniant: quis relicta patriæ damna refarciet? Hoc vbi cōcio obstinatè sibi negari videt: ad castrî Tripolis muniendi cogitationem se confert. Erant eo loco complures milites, qui ætate & vulneribus confecti, bello idonei esse desierant: qui tamen pristinae virtutis memoria, stipendio fouebantur, atque definitum propugnatorum numerum explebant. hos mitti oportere iudi-

19
catur : & totidem eorum loco substitui, quibus vires
labori ferendo suppeterent . præterea, habito censu,
fœminas & impuberes, omnésque quorum animus
aut vires obsidionem sustinere non valerent, in Si-
ciliam transferendos : & in eorum locum , centum
virtutis probatissimæ equites submittendos, cum mi-
litibus qui à Prorege subsidio aduenerāt . cum enim
locum, natura & operibus infirmum, non posse nisi
eximia & excellenti fortitudine seruari . His omni-
bus ab Omede obsistitur . imprimis ad eorum sen-
tentiam non accedit, qui fœminas & liberos à paren-
tibus seiungendos esse censebant : quòd communi
vitio naturæ contingat, saluis rebus, quas quisque ha-
bet charissimas, homines fieri segniores, vt minori
contentione & laborem ferant, & vitæ periculum
adeant, præsertim alieno solo. Neque potiore esse
causam, cur emeriti milites amitterentur : ii enim,
etsi corpore non valent, ingenio tamen & rerum vsu
excellunt: quibus bellum magis, quàm corporis viri-
bus, administratur . Simul de equitibus omnino sibi
videri vt ad Melitam maneant : præstare, sedes pro-
prias plenis copiis conseruare, quàm his in alienas
dispertitis, vtrarumque iacturam facere. Eis rationi-
bus quæ sunt demonstratæ, equites accersitos non
fuisse : qui aderant, vix trecentorum numerum im-
plere, in quibus rei Melitensis salus penitus consisteret.
si ad ducentos redirent, periculum fore ne oneri
succumberent. His oblatis incommodis, nihil expedi-
tius videri, quàm ad insulæ custodiã, retentis equi-
tibus, milites à Prorege missos Tripolim transmittē-

re. horum quidem subsidio, eum locū defendi posse: quòd ea esset eius loci natura, vt, propter stationis incommodum, obsidio diuturna esse non posset. Nam litus planum, exigua altitudine, lōgo spatio, in mare decurrens, in alto naues constitui cogit, ne, Etelsis ea anni tēpestate vi maxima flantibus, fluctibus naues compleantur: aut anchoris sabulo parum hærentibus, vi tēpestatis incitata, ad terram allidantur: quæ res aduersus obsidionem magno forent adiuumento. Hæc vicit in concilio sententia: sed ad nouitios milites perlata, eum incussit metum, vt palàm detrectare militiam non erubescerent: seque, quum tollerentur signa, non sequuturos esse comminarentur. Commonstrabant, sibi tum primū ab aratro & caulis abductis, nullo dum etiam vsu militiæ percepto, Tripolitanum negotium lōgè dissimiles propugnatores exposcere. Omedes, si cladis certa expectatione deterritus, suos equites illò traiici nollat: cur potius in aliena vita fortunā periclitaretur? Hæc Omedi Præfectus renuntiat: & quàm potest demississimè obsecrat, vt sine eius animi offensione, illis liceat in Siciliam reuerti, quòd iussi naues conscendere, dicto non forent audiētes. Huc addit multa, quibus Omedem flekti posse coniiceret. At Omedes, vt hunc ab animi consternatione erigeret, affirmabat certò sibi constare, Tripolim militum virtute protegi posse, alioqui se non esse rem in dubium deuocaturum. eos enim, quorum præsidio castrum tenebatur, & Valerium præfectum, optimè de se meritum, virum singulari virtute præditum, cur amitteret?

Postremò in hac se esse sententia, vt id castrum sine
 auxiliaribus copiis defendi posset: sed à Prorege mis-
 sis necessariò vtendum esse sibi, ne eius auctoritatem
 & consilium despexisse videretur: eámque ob rem
 ab se illos non dimitti. His Tribuno ostensis, id mu-
 neris iniungit, vt affectos metu bona spe reficiat. Sed
 vbi militibus spem missionis Præfectus adimebat,
 maximam formidinem & terrorem inferebat: qua
 animi deiectione, Omedi flentes ad pedes procum-
 bunt: & obtestantur ne se insontes hostibus ad sup-
 plicium dedat. Huius mouendi causa, etiã adiiciunt,
 se rusticos homines ab officio vitæque instituto per
 fraudem abductos, vt Messanam accederent, iner-
 mes prodiuisse, quo mitterentur loco, nulli vsui fu-
 turos. Quum apud eum querelis & precibus nihil
 proficerent: rebus desperatis, inde se proripiunt, & in
 tabernaculis abditi, commune & instans fatum mi-
 serâtur. Eo cognito, quum esset suspicio ducem cum
 manipulis consentire, eius signiferû, virum fortem
 atque interritum, Omedes per hominem idoneum
 sollicitat, & edocet quanta cû ignominia fieret, vt ad
 solam hostium mentionem, timore milites sic op-
 primerentur, vt despecta sacramenti religione, aper-
 tẽ militiam defugerent. hoc non solum eorum exi-
 stimationi, cuius esset in primis habenda ratio, sed
 etiam vitæ fortunisque fore periculosum: quòd fu-
 gam cognitam Prorex esset supplicio crudelissimo
 vindicaturus. Tum orationis adhibitis illecebris, ad-
 dit, de signifero nunquam se dubitasse, quin impe-
 rata facere paratus esset: sed studium eius, tarditate

& timore ducis impediri: cui incōmodo facilè præuerti posset, si signifer singulos milites adiret, qui quandam animi fortitudinē præ se ferrent: ac, quantum posset efficere, inani metu eos explicaret, facerētque vt iter conficere non dubitarent. Hoc si esset assequutus, Tribuno misso, militum præfectura suo nomine fungeretur. Ea spe signifer delinitus, negotium aggreditur: singulos separatim ambit milites, & quibus potest rationibus, ab obsidionis opinione deducit. Hoc animaduerso Tribunus, veritus ne cū ignominia mitteretur, & nihilo secius manipulares præscriptum officium exequerentur, signiferū aditu ad Omedem anteuertit, & quorundam factiosorum cōtumacia, culpam prætexens, vnà cum suis omnibus, vbi primū iussus fuerit, se viam ingressurum profitetur. id tamē omnibus precibus postulabat, vt certus equitum numerus, perterritis militibus, adijceretur: quorum ductu ac virtute, illi animum reciperent. His ab Omede in concilio relatis, deliberatur, quot & quales equites tyronibus admisceri placeret. Qui loco, ob eius infirmitatem, diffidebant: in priori sententia permanebāt, & centum addi oportere contendebant. quibus tamen Omedes, his quæ sunt demonstratæ rationibus, non acquiescere: sed eū numerū ad quinque & viginti reducendū esse dictitare, quos solutis ergastulis, ex eis qui maleficii cōiuncti erat, expleri iussit: ne de Melitæ custodia quicquā imminueretur. His rebus constitutis, duæ triremes impositū subsidium Tripolim importāt: quo in terram exposito, vt mandatum erat, Melitam reuehun-

15
tur. Non ita multò pòst fit Omedes certior, hostilem
classem ad Siciliam applicuisse : & eius principem,
cum Prorege, de oppido Africano recuperando, vti
Cæsari cum Solimano conuenerat, per interpretem
multis verbis egisse. Sed illum postquam se ad Cæsa-
rem fallendi causa reiici cognouisset, ad oppidum
Augusti progressum, arcem vi captam militibus di-
ripiendâ concessisse. Hoc satis erat causa, ad omnem
de Turcharum itinere tollendam dubitationem.
Omedes tamen à pertinacia non modò nō desistit:
sed etiam affirmat Meridianum Siciliae litus præter-
uehi, vt breuiore vsq; itinere naues, citius in Frâciam
perueniant : quod vt persuasum habeant, naucleris
accitis, ex maritimis dimensionibus ostendit, du-
centis passuum millibus, cursum ea parte breuiari,
Gosirani, vbi spe auxiliorum se depulsos esse cogno-
uerunt, fœminas & pueros in tutum censent esse
transferendos. Itaque duas nauculas onustas Meli-
tam traducunt : quarum appulsu Omedi renuntia-
tur, Gosiranos sui tuendi animum abieciisse, atque de
fuga cogitasse : resque suas cum vxoribus & liberis
abigere cœpisse : quibus ablatis, dimicandi etiam co-
gitationem deponerent. si saluam cuperet rem Go-
siranâ, naues Gosiram remitteret, vt propinquorum
misericordia, ad pugnandum alacriores redderen-
tur. Quæ sententia quum illi valde probaretur, naui-
culas, antequam onus exponerent, reuehi iussit : ma-
gnisque cauit pœnis, ne absque venia res vlla expor-
taretur. Biduo quo hæc gesta sunt, leni vento classis
Melitam appulit, portumq; petiit, portui, qui arcem

subluit, coniunctum, angusto collis iugo interiecto. Ad eius conspectum tantus repēte metus Meliten-
sium mentes occupauit, tātāque sequuta est pertur-
batio: vt quid potissimum agendum esset, rationem
inire non daretur. Omnino duo erant oppida, qui-
bus insulani ab hostium periculo ex agris se se reci-
perent: vnum sub arcis radicibus, alterum distans
sex passuum millibus. Huc viis plenissimis omnia
importantur, pecūsque cogitur quoad eius fieri po-
test. Oppidum sub arce positum, collibus vtrinque,
mediocri maris spatio intermisso, continetur. Ex his
collibus magna altitudine impendentibus, quia ho-
stes ab aperto latere muro custodias facile ac penè
nullo labore deturbarent, & iis, qui muro deiccto in
oppidum irrumperent, resistēdi facultatem adime-
re possent: oppidum defendi non placebat. Arx vni-
cum omnibus, & ex agris confugientibus, & oppi-
danis perfugium relinquebatur: tametsi vix antea
caperet Equites, & qui sub Equitibus stipendia me-
rebant. Alteram plebis partem vrbs recipiebat. Ad
has angustias hoc etiam accedebat incōmodi, quòd
quum tanta multitudo admitti tecto non posset, ve-
rū ei necessariò foret, flagrante Canicula, sub solis
ardoribus interdiu, & sub dio noctu, permanēdum:
hæc, neque corpore laborem tulisset, neque ab odo-
re tetro, quem situs & excrementorum colluies ge-
nerasset, erant morbi longè abfuturi. Calamitatem
quoque non parum augebat difficultas aquæ maxi-
ma: cuius quum nulla extra pluuiam esset copia, ne-
que ad bibendum, sed ne quidem illa ad lauandura

16
suppeteret, aut erat deditio sequutura, aut populus
miserè excludendus, & hostium crudelitati expo-
nendus. Subductis & ad terram deligatis nauibus,
hostes ad prædam emittuntur. hi latè peruagati, re-
gionem quæ ad arcem vergit, depopulantur: ædifi-
cia, & quicquid in agris reliquum erat, vel incédunt,
vel diripiunt: pecus, quod repentino eorum incurfu
in oppidum cogi non potuerat, suffodiunt: nullum
denique perniciosi genus prætermittunt. Constat in-
sula tota vna & continenti petra: ea re fit, vt quibus
locis terra exurgit, lapidibus conspersa sit. Hinc acci-
dit, vt illic agri quicquid est, hoc totum incolæ, seu
purgando, seu diuidendo, lapidibus sine luto in mu-
ri speciem aggestis incluserint: quæ res vias publicas
vsque adeò angustas & obliquas reddidit, vt illinc ni-
si magno labore non liceat euagari. Aduersus ho-
stium incurfiones ea commoditate nostri subleuari,
hæc remedia comparabāt. Coactis nauium propu-
gnatoribus, nonnullis admistis remigibus, Guime-
ranus eques Hispanus regionum peritos adhibet:
quorum ductu, occulto itinere profectus, opportu-
no loco suos in insidiis disponit, vt disperfos hostes,
sine metu ad prædam properantes, excipiat. In hunc
incidūt pauci, qui elati prædæ studio, ab agmine lon-
gius processerant: neque vlla alia rei gerendæ facul-
tas oblata est. Interim classis princeps, arcis naturam
contemplatus, eam præsentis occasionis nō esse iu-
dicat. Hostes vexādis regionibus biduo consumpto,
naues soluunt: & sex milibus passuum progressi, con-
sistunt, ac denuo milites effundūt: & ne vlla pars in-

fulæ immunis à calamitate relinqueretur, profligato eo spatio quod à mari ad urbem intercedit, ad eam se incitant. Eò tanta vtriusque sexus multitudo sese concluderat, vt nullus vacaret locus: sed qui bello apti essent, quæue hostium vel aciem oculorum ferre possent, admodum pauci erant. In eos imperium gerebat Georgius Adorneus, vir probatæ eximiæque fortitudinis, qui denegato sibi ab Omede militum auxilio, reiectus ad multitudinis præsidium, triginta ex nauium defensoribus ad sui custodiam asciuerat. Conspectis hostibus, eos cohortatus, nonnullis ex pastorû & oppidanorû multitudine nominatim euocatis & interiectis, in hostium occursum eduxit: vt hostes, locis asperis, in collem in quo oppidum positum est enitentes, morarentur: quod ad ostentationem potius faciebat, quàm quòd vim hostium reprimere posse speraret. Nostri, urbis propinquitati & ænearû cannarû adminiculo confisi, audacter se illis opponebāt, & quādiu æqua ratione pugnari potuit, pauci multos ascensu prohibebant. At vbi illos circumfundi, & longo circuitu montē superare conspiciunt, ne circumuenti reditu excludantur, accepto signo, paucis vtrinque desideratis, pedem referunt: discessu nostrorum, illi iugum collis adepti, simul nullis resistentibus, suburbiiis potiti, confidunt & castra faciunt. Inter suburbia & oppidum tantum est interualli, quantum cannæ tueri possunt. Hi explorandi causa rari & dispersi, ne cannarû iniuriæ paterent, incitato cursu percurrunt: muroque succedentes, sclopetis nostros tentare & laceffere. Hos quoque

17
nostri sclopetis summovebāt, sed ob eorum mobilitatem non multum proficiebāt. Nox praelium dirimit. Explorato urbis situ, duabus partibus, colle prae-rupto & directo, hanc hostes extare conspiciunt. Huius collis tertia pars aspera quidem & ardua, sed longe declinior, in vallem ducentis passibus lata definit. Hanc transeuntes, mons urbi contrarius excipit ascensu aspero, praecipiti & circunciso, cuius montis fastigium urbem exaequat. Municipales huic parti minus diffidentes, nullas turres, nullaque propugnacula excitant, quibus irruentes hostes a latere propellerent: sed in speciem, muro lapidibus luto compactis extructo, fuerant contenti: qui quum per se infirmus sit, atque adeo vetustate corruptus, sua sponte collabitur. Quo ab hostibus animaduerso, partem, unde a suburbiis ad urbem est aditus, quod sit operibus valde munita, omittunt: atque ab infirmiori loco rem sibi gerendam esse constituunt. Huc delati, aream cannis muralibus noctu substernere, atque aggerem iacere parabant: & quum propter arborum raritatem materia deesset, valuis, omni-que ligni genere, a tectis suburbiorum ereptis, ad opus utebantur. Hoc, ex strepitu cognito, tantus moeror municipalis excepit: ut suae vitae durius consulere plerique inciperent, ac se de muro dare praecipites, omni contentione opinione remissa. Adorneus tamen non se deserit, hos verbis confirmat, & spe auxiliorum obiecta, a metu erigere conatur. At ubi se frustra niti intelligit, a periculi magnitudine sibi timens, ad Omedem nuntium allegat, ut eum doceat, qui multitu-

dinem verſaret timor, & ad quas ipſe anguſtias red-
actus eſſet: Niſi ſummiſſis auxiliis, formidine mu-
nicipes liberarentur, vltimam perniciem quinque &
viginti millibus capitū mox ſubeundam eſſe. Nun-
tius, quum ad arcis oppidum perueniſſet, & obſer-
atis portis, ingreſſu tardaretur, ad eum locum ſe con-
tulit, qui Fracorum cuſtodix commiſſus erat, vt per
mare intromitteretur. Tum ad opus excubabat Vil-
lagagno, & vigilias circuibat: is ad equorum fre-
mitum exclamat, quis aduētarer. nuntius, patefacto no-
mine, reſpondet maximi ſe momenti mandata af-
ferre: rogare vt continuò ad Omedem traiciatur.
Exceptus lenunculo, ad Omedem feſtinat. hoc au-
dito, magna illum inuaſit ſolicitudo: neque illi ſatis
animo ſuccurrit, periculo tam præſenti quem maxi-
mè opponeret. Quum in hoc explicando ſe exerce-
ret, nuntius Villagagnonem commemorat. Hunc
approbatū, eo ipſo temporis pūcto, accerſit. Adeun-
tem verbis & oratione liberaliter proſequitur. Nar-
rat, quantum ei ſemper tribuiſſet: Rempub. tempo-
re maximè difficili, eius operam & diligētiam vehe-
menter expoſcere. hoſtes enim vrbeſ obſidione
cinxiſſe, quibus id fieri poterat locis: in ea tamen, qui
arma ferre poſſent, magnum numerum incluſum,
quorum præſidio vrbs planè teneri poſſet, ſi viri ido-
nei imperio regeretur, qui vbi vſus incidiſſet, reme-
dia compararet. Eis Georgium Adorneum præſſe,
ſed omnia per ſe negotia obire nō poſſe. Villagagno
reſpondet, Reipub. commoda, prima ſemper apud
ſe fuiſſe, ſuæque vita potiora: neque quicquam opta-

18
tius sibi posse contingere, quàm vitam profunderè,
cuius rei causa in lucem editus fuisset. Verùm se vsu
rerum didicisse, plebem vigiliis & periculis insuetâ,
facilè insolenti labori succumbere, ac pariter viribus
& animo concidere. hinc fieri, vt quandiu munitio-
nibus contacta sit, seque à periculo abesse credat,
æquo animo omnes acerbitates perpetiatur: sed vbi
tormētis murus discuti cœperit, & ab animi fortitu-
dine præsidium petendum sit, proiecta salutis cura,
protinus deficiat. In eum casum defensoribus opus
esse, non ignauis, sed strenuis, ac laboris patientissi-
mis, & qui non metu, sed gloria permoueantur: ne-
que pauciores centenis ad eum vsu esse necessa-
rios. hos sibi ex equitibus Omedes adiungeret, si rem
saluam esse vellet. Huic Omedes ostendit, equites &
nauium propugnatores arcis custodiæ à concilio as-
signatos esse, cuius decretum non posset immutare.
Attamē id ad se recepturum, vt in præsentem occa-
sionem, alio consulto non expectato, ei sex equites
concederentur. Quibus opponit Villagagno, sex vi-
ros, euerso muro, non esse irrumpentes hostes repul-
suros: neque aliò sex virorum subsidium pertinere,
quàm vt eos ad certam sine honore perniciem per-
duceret. Respondet Omedes, eā rem non esse dispu-
tationis, sed instantis periculi. propterea si ille ani-
mo ita paratus esset, sine cunctatione eam operam
Reipub. nauaret. quòd si metu periculum defuge-
ret, se alium rogaturum. Ille, vbi rem in existimatio-
nis discrimen pertrahi videt, Non sum, inquit, Prin-
ceps, tam acuto stimulo vrgendus: faciam vt intelli-

gas ad ignauiam, hanc meam rationem non spectare: & iam viæ me committā, ne in lucem extractus, ingressu prohibear. Excedens igitur Villagagno, sex è notis & domesticis euocatis, iumenta nactus quæ ex gregibus casu obuenerant, viam ingreditur: tantumque omnibus profectiois fuit studium, vt pars graui armorum pondere onusti, absque ephippiis iumenta conscenderent: & franis deficientibus, in os immisso funiculo, viam conficerent. In hunc modum progressi, albente cælo, quæ erat cursus commodissimus, concitatis equis, ad urbem perueniunt: & occlusis hostium vicinitate portis, in fossam se proruunt, ac fenestris quæ in vsum tormentorum relicte sunt, ad munitiones enituntur. Hos introductos, magna hominum turba circumfistit, & de auxiliis, quid afferrent spei sciscitatur: quos bono animo esse iubet Villagagno, & spe auxiliorum iniecta confirmat. Deinde, ad Adorneum se confert. Hunc docet quem cum Omede sermonem de propugnationis ratione habuerit: quidque assequutus eo fuerit. denique, huc se redactos esse, vt ab alieni subsidii expectatione depulsi, in animi virtute salutis fiduciam constituant. Huc etiam curam omnem profundi oportere, vt à terrore populi mentes explicarentur: & quibus locis ab hostibus noceri possit, prouiso remedio anteuenteretur. Comuni deinde consilio res geritur: & perspecto muri vitio, quod hostes animum appellebat, quoniam obsisti non poterat, ne murus cannis tentatus breui corrueret: hac ratione occurritur. Post murum fossam sedecim pedes latam, altam decem, directis

lateribus perducūt. Huius interiori labro maceriam
tres pedes eminentem, in sex pedum latitudinem,
extruunt:quam amplius extare consultò noluerunt,
ne globi murum traicientes, simul maceriam labe-
facerent, atque fossam implerent. Ad extremas fos-
sas ex duobus tectis à summo decurtatis, & macerix
adæquatis, cæca propugnacula constituerunt: vt ho-
stes fossam ingressos, in maceriam connitentes, ab
latere, sine vlllo periculo, tormētis deturbarent. Quæ
munitiones, tantæ multitudinis labore nō intermis-
so, breuissimo tempore perfectæ sunt. At hostes hæc
difficultas morabatur. Cannæ murales sex milibus
passuum erant eis ducendæ, via asperrima, magnis
& arduis rupibus, nulla iumentorum facultate. Hoc
feruorum robore supplere conati, labore continen-
ti, aliquandiu processerunt. Nam quum viarum an-
gustix & asperitates, cannas rotis impositas non ad-
mitterent, rotis eximebant, ac nudas efferebāt. Mox
æquum locum assequuti, rotas admoueabant, & ma-
gno conatu onus trahebant. sed quoniam id erat sæ-
pius repetendum, & ob vehementem æstum ple-
rosque animus reliquerat: rotis aliquot effractis, ab
itinere supersederūt: reuocatisque qui obsidioni in-
cumbebāt, ad naues sunt reuersi. Ex perfugis, cogni-
tum est his causis hoc quoque accessisse, quòd naues
erant longo interuallo defensoribus vacuæ relin-
quendæ, aut copiis perexiguas vrbs oppugnanda.
Quorum vtrumque recipere casum posset. si enim,
nauibz inanibus, Cæsariana classis occurrisset: & ea
conspecta, hi ad suas conseruandas naues se incitaf-

Camē moralis

fent : tūmq̃ obſeſſi ad pugnam erupiffent , copiis
ab Omede miſſis confirmati : ea itinerum aſperitate ;
quum referre nō potuiſſent , cannas amiſiſſent . Quæ
cogitatio certiffimam obſeſſis ſalutem attulit . Quā-
uis enim accidiffet , vt obſeſſi ab hoſtibus ſe protege-
rent , tamen ob aquæ inopiam , obſidionem diutius
non tuſiſſent . Vbi ſuburbia eſſe indicauiſus , plures
optimi ſaporis fontes largiter ſcatent . Huic copię
municipes cōſiſi , fodiendis puteis animum non in-
tenderant : paucis exceptis , qui aliunde aquam eſſe
ſibi colligendam non ducentes , effoſſis domi cifter-
nis , pluuiæ vti maluerāt . Harum inito numero , & ca-
pitum cenſu relato , compertum eſt , ad duos cyathos
cuique quotidie vix ſex dierum aquam ſuppeteret .
Hoſtes reductis tormentis , ad inſulam Goſiram con-
tendunt . In caſtellum incolæ ad vnum ſe incluſerāt .
Hoc quia à mari parum abeſt , expugnationi oppor-
tunius eſſe iudicatum eſt . Itaque cannis muralibus
productis , tertia inita vigilia , murum percutere inci-
piunt . Hunc impetu continenti nullis prohibenti-
bus incutientes , breui tempore labefaciunt . ſed ea
eſt loci natura , vt ſi vel murus deiectus eſſet , paucis
tamen defendētibus , maximæ quæque copię aſcen-
ſu prohiberentur . Nam in rupe editiſſima quoquo-
uerſus abrupta caſtellum eſt poſitum , inflexo , accli-
ui & anguſto ſpatio , quā vix ſinguli carri trahi poſ-
ſint , ad introitum relicto . Municipes , hoſtium adue-
tu , principem , cui tantum ab Omede tribui demon-
ſtrauiſus , adeunt : atque animo perturbatum obte-
ſtantur , vt Rempub. fortiter ſuſcipiat , neu ſe deſerat :

sed audacter, quid cuique sit agendum, imperet. Is spe auxiliorum lapsus, profitetur se nihil habere quod tanto malo opponat: atque omissa suorum cura, recto succedit ac delitescit: sic paratus, ut quem casum fortuna obtulisset, quam æquissimo animo ferret. Vbi populus se destitutum perspicit, tanto metu corripitur, ut vna corporis & animi viribus caderet: & ab propugnationis artibus, ad lachrymas, instantisque calamitatis commiserationem auersus, murum defensoribus nudaret. Neque dum nocte pugna intermittitur, aut demolitionem obstruere, aut omnino rem ullam administrare quæ ad suam salutem pertineret, animum induxerunt. Postridie, quum prima luce ad opus hostes redirent, sed iniquitate loci non ita multum promouerent: vir Anglus, canarum magister, animo reuocato, honestam mortem turpi seruituti anteferens, ad pugnam se instituit. Profectus quò negotium postulabat, aptatis machinis, hostes globis impetit, & illato damno cogit ut remissius & lenius deinde opus agerent. sed hunc paulò post, translatis cannis, globis assequuti, hostes interficiunt. Qui visum eò se intulerant, casu exterriti, quum reliquum haberent neminem, quem huic muneri præficerent, animi inopes & consilii, ad principem recurrunt: ut secum rationem iniret, quid potissimum administrandum esset. Hic magno animorum & sententiarum congressu decertatur, nec inter eos de pugna conuenit. Postremo, re in desperationem adducta, à pugna subsidio ad deditiois consilium recurrunt. Tum de conditionibus agitur, & qui eas perfe-



rat, eligitur . Cuius legationis hic erat exitus , Si omnibus incolumibus effugium pateret , arcem hostibus relictum iri . Legatus, de muro fune demissus, ad classis præfectum deducitur, quæque habet mandata pronuntiat : atque demississimè obsecrat, ut misericordiæ locus relinquatur . Ad hæc respondet Princeps, priusquam globi murū attigissent, ad aliquam æquitatem descendi potuisse : re verò ad extremam deditionis necessitatem perducta, à victis conditiones ferri non debere, sed hos eis uti, quas victor præscriberet . se tamè naturæ lenitate ad misericordiam propèsum, non esse pro eorum meritis, qui visis Solimani signis portas suas obstruxissent, pœnas exacturum , si se suæque omnia statim dederent , & eius misericordiam experirentur . Atque hunc ita dimittit . Hoc responso inclusis denuntiato , animus fluctuare, atque in diuersum trahi cœpit . Tandem superat eorum sententia, qui morti seruitutem prætulissent: sed dux eorum sibi conandum adhuc esse arbitratus, ducenta capita, quæ ipse nominasset, necessitate seruitutis liberare, remisso interprete, id enixè contēdebat . Sed his ad quadraginta reductis, Bascianus comminatur, nisi statim mandatis paruissent, nullam eis postea colloquii fore potestatem . Qua denuntiatione perculsi municipes , quum aliunde nulla esset euasio, imperata faciunt, & portas obstructas aperiunt . Erat in eorum numero vir Siculus, cuius insignem animi (dicamne fortitudinē, an crudelitatem?) prætereundam esse non putavi . Hic contracto apud Gosiранos domicilio, vxore ducta, duas,

ex ea filias sustulerat : quas viro maturas, ne, quum in potestatem hostium incidissent, oculis sustinere cogeretur, quod animus ferre nō posset, ambas gladio traiecit: eandem fortunam tulit mater, ad filiarū necem accurrens. Hoc factō, balistam & sclopetam instruit, fores domus asseruat, ac hostibus ad prædam festinātibus se obtrudit: duosq; audacius progredientes missilibus appetit & perimit : deinde stricto gladio reliquos irruentes moratur: donec circumuentus confoditur. hoc modo se & familiam seruituti præripuit. Castrum hostes diripiunt, habentque vniuersam ad vnum multitudinē prædæ loco : captiuamq; ad naues abducunt. Ea sex millium trecentorum numerum explebat. Bascianus, vt fidem de quadraginta liberandis præstitisse videretur, quos senium & aduersa valetudo viribus confecerat, à vinculis eximi ac manumitti iussit. Eorum principem iniuriam sibi fieri querentem, quòd vnà emissus non esset, expoliatum addixit remigio. His rebus biduo cōsumptō, castro incenso, totaque insula exinanita, ad reliquam belli administrationem properantes, naçti idoneam tempestatem, ad Africam vela dirigunt. Post eorum digressum, Omedes de casu Gosiranorum, & detrimento Melitenensibus illato, Proregem Siciliae certiorrem facit. Sed vt deditiōis turpitudinem elueret, euocatis autoribus sibi notis, edixit, vt per totam Europam dimissis literis, hanc opinionem in animos hominum infunderent, Quandiu castrī præfectus anima exuperasset, castrum à periculo longè abfuisse: sed quādo se egisset quòd vsus inciderat, & ictu tor-

mentorū elatus esset , perculsam destitutamque multitudinem, ad deditiōis consiliū deuenisse. Hæc dissipata fama adeò valuit temporis opportunitate : vt, quum deinceps exponeretur, quo modo res euenisset, fides fieri non posset . Aliquo post dierum interiectu, Aramo Legatus orator regius, ad Solimanum Imperatorem iter habens, Melitam duabus triremibus & vna biremi aduehitur, & iactis anchoris Omedem conuenit, eique in concilio exponit, quæ à Rege ad eum haberet mandata : suamque operam ex Regis præscripto ad omnes casus pollicetur . Omedes huic actis gratiis, quanta ad id vsque tempus perpeſsus esset, quidque adhuc periculi in arcem Tripolitanam immineret, amplissimè narrauit . Hæc autem periculi erat suspicio, quòd ex quo Cæsar Tripolim Equitibus attribuerat, ob summam ærarii tenuitatem, hi, quæ deessent munitionibus, perficere non potuissent . Ea de re, A Eneobarbi in Franciam traiectione, Cæsarem certiore factum, omnibusque precibus rogatum fuisse, vt huius loci curā Equitibus adimeret, ac in se reciperet . sed hoc eum respõsum dedisse, Tripolim sine Melita seruari nõ posse, atque vnus salutē in alterius salute consistere: Equites, aut Melita excederēt, aut vtrunque sustentarent. Postremò, per excellens Regis in Equites studium, & singularem beneuolentiam, Aramo rogarur, vt labantem atque inclinatham fulciret militiam : totoque animo insisteret, vt ab itinere ad hostes diuerteret, & ab oppugnatione Tripolitana eos deduceret. Quòd si suo nomine adipisci non pos-

set, id autoritate regia niteretur. Hoc & honori sibi, & Reipub. Christianæ commodo futurum. Vt Aramo heri sui fidem tam intimè implorari perspicit, cuius insignem charitatem erga eum ordinem paulò antè ad concilium pertulerat: etsi multis rationibus ad iter institutum trahebatur, ne tamen Omedes queri posset, tali tempore proiectum se & desertum fuisse, precibus assentit, & quātum gratia apud Bascianum valeret, se conaturum pollicetur: déque eo quod cōsequi posset, si celox ad hūc vsum tribueretur, quamprimum significaturum. His rebus agitatis, accepta celoce, ad Tripolim cursum instituit. Eò deuectus, cernit cannas murales iam in terram expositas: fossasque duci cœptas, quibus hæ sine periculo ad muros producerētur. Non tamē se abstinuit quin summis precibus, totoque animi conatu, ab oppugnationis sententiā Bascianum deducere contenderet. sed hoc responsum tulit, Equites, amissa Rhodo, fidem suam Solimano obstrinxisse, contra Turchas arma se nunquam esse laturos: sed eos sprete iurisiurandi religione, quum à Carolo Cæsare Solimano bellum inferretur, non solum operam conferre, sed etiam ipso quiescente, quantum possent efficere, suo nomine Turchis molestiam exhibere. Hos nouissimè ad Africanum oppidum, magnū Dorguto incommodum attulisse: quam iniuriam bello persequi Solimanus decreuisset: eamque ob rem maximè classē instruxisset, vt eos Africa expelleret: huius non posse mādātum negligi. Aramo, quum propositum non obtinuisset, in animo desiguit, nullam

temporis partem intermissa nauigatione, Solimanum esse sibi adeundum: vt ab hoc impetraret quod Legatus concedere non poterat. Itaque à Legato petit, vt sua voluntate id sibi liceat. Hoc ipse abnuuit, & paucorum dierum moram postulat. dum expectatur quis euentus obsessos excipiat, Aramo spe profectiōis depulsus, quatuor à classe passuum millibus naues suas promouit: atque ad nutum Basciani, in anchoris oppugnationis exitum operitur. Nostri vt conspiciunt operibus hostes animum intendisse, cannis fortissimè rem gerunt, ita vt insolentius progredientes, & machinas incautius proferētes, earum aliquibus effractis, regredi vltra pilarum iactum cōpellerent: & mediocri latitudine fossas agere, nostrisque obducere, quibus tecti sine periculo in opere versarentur, machinasque promouerent. Erat hoc eis non difficile, quòd & castro magna obiecta sit planities soli arenacei, & seruorum maxima copia valeant. Hoc artificio, vsus tormētorum, quibus omnia nostri sperauissent, interiit. Quinimo hostes effecerunt, vt viis cæcis occulti, fossæ castri succedentes, cannas maximas sex & triginta, nullo suo malo, contra arcem collocarent: tum fuit vsquequaque nostris iniqua contentio. Castellī murus cæmentis luto compactis constructus est: turribus ab angulis, angusto spatio vltius exporrectis, sabulòque refertis congesto. Murum quoque vetustas sic affecerat, vt ariditate lutum in puluerem desinens, penitus deflueret: atque coagmenta lapidum glutino destituta dehiscerēt, antequam Brachamondus eques Hispa-

21
nus, huius loci procurationem adeptus, animadu-
ersum vitium calce obduceret, totumq; murum deal-
baret. Operibus perfectis, hostes hoc ordine in ad-
uersum murum cannas statuerunt. Duodecim, eo-
dem temporis articulo ignem concipientes, vnum
omnes impetum faciebant. Mox, dum inanes refer-
ciuntur, sequentes duodecim, flamma pariter com-
prehensa, globos ad eandem contusionem, quam
priores, eodem vestigio eiacularantur. Protinus or-
do tertius hoc exemplo erumpebat. Ita eueniebat,
quum nulla pars temporis à pugna intermitteretur,
vt & murum afflictum muniendi, & omnino in eo
consistendi facultas eriperetur. Fœlicitate maxima
contigerat, vt quam muri partem hostes appeterêt,
ea esset substructionibus & aggere obiecto firmissi-
ma: quibus munitionibus, globi quum murum traie-
cissent, tardabantur. Accedebat, quod globi, supre-
mum fossæ labrum transuolantes, muri fastigium
quasi ad amissim abradebant, tanta inferius altitu-
dine relicta, quanta ab imo summa fossæ extabant
labra: quæ altitudo, quod scalas non admittebat, no-
stris maximè solatium præbebat. Erat inclusorum
in numero, Prouincialis Cauaglioneensis, qui longa
motus eius regionis consuetudine, à Christiana re-
ligione defecerat: & mercede iandiu nostrorum
consilia hostibus efferebat. Hic seu loco timeret,
seu pactione cum hostibus ita conuenisset, ad eos
transfugit: cognitisque antea castelli omnibus in-
commodis, quid in munitionibus perfectum non
esset, quaque murus attêtandus esset, hostibus enun-

tiat. illi hoc audito, quò is indicauerat, tormēta pro-
uexerunt. Partem indicio cognitam Principis habi-
tatio imbecillam reddiderat. hæc enim castrī mœ-
nia contingit, eundēque cum castro murum ha-
bet. Supremum domus tabulatum, receptui Princi-
pis erat accommodatum. Cui subiectum spatium,
vſui cellæ promptuariæ erat attributū. hinc fiebat,
vt nullis ſtructionibus, aut aggeſta terra, ea pars mœ-
nium firmaretur. Oſtēdimus ſumma fossæ labra ab
imo ſolo tātū exurgere, vt quum globi transmiſſi
murm ad libram diſcuterent, ipſius tamen labefa-
ctati ſummitatem ſcalæ productæ pertingere non
poſſent. Hoc, ne hoſtium, muri infimi ſubruēdi pro-
poſitum impediret, ii, effoſſa quantum ſibi ſatis eſſe
viſum eſt terra, & egeſta, vſq; eò cannas demiſerūt, vt
certiſſimè locū à perfuga notatū attingerent. Intētos
operi tegebat fossæ paries olim à Cæſarianis aduer-
ſo caſtro trāſductus, vt arenas in fossam profluentes
ſiſteret. hic paries, vt ignis cannis admouetur, deiici-
tur: & ad muros globi perueniunt, eòſque breui tēpo-
re perfodiunt. pars muri ſuperior, habitatione prin-
cipis, cellæque teſtudine muro innitente aggrauata,
frequenti commotione cœpit procumbere. Huic
periculo quum noſtri milites nullū remedium in-
uenirent, tantus eis timor, tantæque animi perturba-
tio inceſſit, vt palàm & apertè, proiectis armis, ab of-
ficio diſcederent: & ſpem extremam ſalutis in dedi-
tionis ſubſidio collocantes, ita per honeſtiſſimos ſui
generis inter ſe colloquerentur, debere ſe ſuæ ſalutis
rationē habere: quoad licuerat, ſe ſatis officio feciſſe.

se:re vero' desperata & perdita, non eis esse succen-
sendum, si sibi consilium caperent. Gaspar Valerius
Allobrox, vir à prima pubertate, ob animi præstan-
tiam perpetuamque vitæ foelicitatem, ab Equitibus
maximo in honore semper habitus, & propterea gra-
ui hoc tempore, castelli imperio præfectus fuerat. Is
re cognita, aduocato sacerdote, in templum concess-
ferat, vt confessionis religione conscientiam suam
expiaret, & inde securius periculum iniret, suoque
exemplo milites in officio contineret. in hoc occu-
patum nonnulli eorum qui inter milites primas te-
nebant interrumpunt. Exponunt, milites sic animis
cecidisse, vt pristina virtutis immemores, neque vi,
neque pudore retineri potuissent, quominus murû
custodiis vacuum cōtra imperium deseruissent: cō-
que rem rediisse, vt serui quatuor, catenis vincti, quâ
murus suffossus erat, ad hostes transfugissent. Vale-
rius rei iniquitate permotus Equites accersit, apud
quos se in tantis malis derelictum queritur, ac de sa-
lute communi orat & obsecrat, vt operum aliquam
rationem instituant, quibus auerso periculo milites
se colligerent, & ad dimicandum animum recipe-
rent. Poësius Francus, maximi vir animi, vsu rerum
& temporis prærogatiua cæteris anteibat. hic pro so-
ciis verba facit, & militibus contumeliosis vocibus
castigatis, quod tam leuiter animo defecerat, osten-
dit rem non ita profligatâ esse, si ad se redirêt, vt spes
nulla salutis superesset. Inde aduenire se, quò esset
illatum damnum: cellam promptuariam, quanuis
magno labore, citò tamē refici posse, si studium ad-

hiberetur : & fornicem , cuius casum præcipuè formidarèt, asseribus & sublicis subiectis suffulciri, dum cella cõpleretur. Præterea turrim nõ è longinquo ad eam partē spectare , qua hostibus esset in arcem inuadendum. inde ad fornicem fossam ducere licere, & hanc ab labris vallo intercludere , ne proruentes hostes se diffunderent: sed conferti, & intra fossæ angustias coacti, ad turrim rectà peruenirent . Huc, si quicquid erat tormentorū, conferretur, & in aduersos hostes obiiceretur, certissimo fore ad eos propulsandos remedio . Quinetiam si ad ipsas muri ruinas res gerenda esset, virtuti tamen locum non defore: quòd quandiu hostes cum nostris manum conferebant, eorum cannæ à pugna supersederèt, ne vtrique pariter protererentur. Denique præstare, fortiter pugnando, vita cum honore defungi, quàm hostiū crudelissimorū arbitrio deditos, ad supplicium summósque cruciatus trahi. In eam sententiā, hoc, Equitū, suóque nomine proficitur, si se milites ad pristinā alacritatē reuocarèt, & Equitibus pugna defessis vellet succedere, sese primum hostiū impetū laturos. Hunc dicentem arcis argozilus Hispanus , maximæ inter milites autoritatis, interpellat, Francorum & Hispanorum longè diuersam esse rationem: Frācos amicitia & fœdere cum Turchis coniunctos, quibuscum bella continentia Hispanis intercederent. item quotquot essent castro conclusi, Hispanos, aut aliunde ex Cæsaris esse ditione, paucis exceptis Francis, quibus regiæ naues hostilibus admixtæ profugio paterèt. Ea fiducia, Poësum hanc animi præsentiam

2
ostentare, sed Cæsarianis certam esse perniciem paratam, nisi tempori sibi prospicerent. Breuem esse consulendi occasionem; quum vsque ad vesperam murus stare non posset, nisi hostes pugnae finem facerent. Quòd si vel diutius oppugnatio sustineretur, spe tamen auxiliorum militibus adempta, hostibus tandem cedendum esse, atque inuitam deditiorem subeundam. Assentiunt qui aderant equites Hispani, Tribunus militum & Quæstor: quique militum nomine conuenerant. Quibus iratus Poësius, conuiitiis Argozilum prosequutus, à concilio se subducit: atque, Agite, inquit, Equites vt lubet: hac certè calamitatem meam consolabor, quòd me militiæ nostræ officium integerrimè præstitisse affirmare poterò. Hunc reliqui Franci, & vnus Germanus, qui cum eo aduenerant, consequuntur. Eorum discessu his de rebus agitur liberius. Quæ Argozilus proposuerat, plenius & vberius repetit: ac tot virorum, fœminarum & puerorum periculo Valerium ad miserationem cohortatur: quibus omnibus, si castrum irruptione caperetur, miseram seruitutem aut mortem crudelissimam pati necesse esset. Dum adhuc aliquid spei restabat, ad aliquam cõpositionis æquitatem hostes adduci posse: qui, si expectaretur, dum radicitus murus conuulsus esset, nulla erant posthac vsuri pacis conditione. Valerium Poësii oratio anxium detinebat, & à concionis iudicio distractum ad pugnae cogitationem reuocabat. sed eò acrius commemoratione periculi, ex militum metu, à perterritis vrgetur, in eam occasionem dux nouorum dele-

ctuum deierat, suæ non esse potestatis, vt vel vnum
ex suis ad muri custodiam adigeret. Qua periculi re-
præsentatione Valerius adducitur, vt mittendum esse
putet, qui murum dirutum, quæque de operum ra-
tione Poësius differuisset, diligenter inspiceret. Huic
rei Guiuarrus Hispanus præficitur, cui propter æta-
tem, & rei militaris scientiam milites plurimum tri-
buebant. Is refert damnum opinione maius acce-
ptum esse, neque contra talem tormentorum impe-
tum, ad noctem murum posse consistere: longum
& impeditum sibi videri quod Poësius ostenderat.
His in concilio agitatis, vt iam omnia Valerium de-
ficere viderentur, hunc impellunt, vt è muro facta
significatione, hostes ad colloquium euocentur.
Accurrentes interrogantur, an liceret obsessis ad Ba-
scianum de compositione legatos mittere. Dum af-
fertur responsum, de cōditionibus deditiois in con-
cilio disputatur. Hic tandem omnium sentētiarum
fuit exitus, si omnibus ad vnum pax esset, atque in-
columibus excedere concederetur, & ad transmit-
tendum naues attribuerentur, castrum relictum iri.
His cum Basciano tractandis conditionibus Hispa-
ni duo delegantur, vnus eques, qui suorum nomine
promitteret: alter Guiuarrus, cuius suprà mētionem
habuimus. Hi facta potestate, ad hostes profiscun-
tur, quæque habeant mandata, exponunt. Bascianus,
his auditis, hac lege quò cuperent se descensurum
esse pronuntiat, si de omnibus impensis sibi satisfie-
ret. Legati multis rationibus propositis, quibus sum-
ptuum rationem non habendam esse contendebāt,

expensas restitui posse negāt : quūque Bascianum
 minimè mouerent, re infecta ad castrum se referūt.
 Hos Dorgutus Raſius cōspicatus, vana delusos pol-
 litatione remoratur, dum à Basciano rediret. Ad
 quem quum se contulisset, monet ne sua sponte de-
 ditionem maturantes repelleret, eis omnia liberali-
 ter promitteret, & quum sibi liceret, ad libitum con-
 cederet: ne à præcisa spe misericordiæ ad animi for-
 titudinem recurrentes, vltimam necessitatem expe-
 rirentur. Murorum magna iam parte deiecta, si reli-
 quam labefacere perseueraret, castrū expugnatum
 maximo labore reſectum iri: & periculum fore, ne
 post classis profectionem, eius restituendi faculta-
 tem Cæsar præriperet. Hac monitione, mutata sen-
 tentia, Bascianus Legatos reuocari iubet. Reuerſos
 verborum illecebris irretit, vt credant Salaraiſio &
 Dorguto se remiſſiſſe quod de ſumptibus repræſen-
 tandis antè conſtituerat: atque horum gratia, quam
 obſeſſi pacis conditionem obtuliſſent, ratam habe-
 re: v'tque magis falleret, vanam iuriſiurandi religio-
 nem per caput heri Solimani, dictis adiungit, atque
 in fraudem illeſtos ita dimittit. Hos cominus infe-
 quitur homo inter Basciani domeſticos exquiſitus,
 qui Valerium aduocaret, vt cum Basciano de naui-
 bus pro capitum numero præparandis tranſigeret.
 quod si Valerius hæſitaret, atque egredi dubitaret, af-
 fingeret exquiſitus ille, se obſidis loco remanſurum:
 interim ſingulorum obſeruaret vultus, quid ſiduciæ
 præ ſe ferrent. Intromiſſus, Valerio legationem ex-
 ponit, & cunctanti verbis affert confidentiam, ac de

Basciano docet non esse metuendum, ne promisso non satisficeret, quum fidem iureiurando per caput heri astrinxisset, quod ei nationi omnium grauissimum & sanctissimum esse solet. Sumpto ad respondendum spatio, Valerius rem ad concilium defert: varia dicuntur sententia: huc tamen omnium spectabat exitus, ex temporis & rerum iniquitate consilium capi oportere. Eò calamitatis se redactos esse, ut hostium manus effugere non possent, sed eorum nauibus sibi esse transendum. Itaque præstare vniuersi periculo experiri quid esset in eis constantia & fidei, quam expectare dum vniuersi potestatem sui facientes fide non seruata perirent. Eos, homines barbaros, iracundos & superbos esse. Si Valerius ad colloquium inuitatus prodire recusaret, hoc occasionis loco sumptum iri fidei violanda, cui credendum esse non duxissent. Secundum hæc Valerius discrimini se committit, & equitē ex domesticis viā comitem asciscit, ut si quid contra fidem accidisset, per hunc reliqui facti certiores sibi consulerent. Quem obsidis loco retinere poterat, noluit: ut maiorem fiduciæ significationem ederet. Sed ubi ad Basciani tabernaculū appropinquarūt, præcurrit ille, & enūtiat, vnde veniret, omnes esse perturbatos: ut quum vultu metū nō tegerēt, non fuerit iudicare difficile, eis videri nihil longius, quàm ex quibus premeretur angustiis euadere: si Bascianus pergeret, quæ cuperet, omnia consequiturum. Hoc intellecto Bascianus, Valerium acriter excipit obiurgatione, quòd in tantum cōtemptum ipsi venisset Solimani classis, ut instar alicuius stabuli ca-

strum contra hanc armis tueri in animo habuisset. hoc eum facto extrema omnia cōmeruisse: veruntamen si sumptus qui in castelli oppugnatione facti erant, rependeret, ipsi ignotum iri: id si non faceret, obsessos impēsarum loco haberi oportere. Hoc edicto Valerius perturbatus, pactiōem initam proponit, fidēque sibi datam requirit: cuius si Bascianum poeniteat, vt rem infectam esse velit, hoc se contentum esse, sibi modò reuerti liceat, vnde fide publica vocatus aduenerat. Hoc ei negato, ægrè permittitur, vt viæ comitē ad suos remitteret rei nuntiandæ causa: quo misso, ipse ad naues traducitur, & in vincula coniicitur. Qua re per nuntium cognita, varius obsessis incessit dolor. Quūque non satis animo complecterentur, quò se à tam repentina & acerba calamitate auerterent, luctu & querelis diem cōsumentes, sui muniendi diligentiam omittebant: atque ab Equitibus milites incitati vexatīque conuitiis, defixo ad terram vultu, flentes in tabernaculis cum vxoribus & liberis abditi, suam perniciem miserabātur: neque vlla ratione obtineri potuit, vt ad dimicandi propositum animum aduerterent. Postero die, prima luce, idem qui nuntium infaustum attulerat, ad hostes remittitur, vt intelligeretur an Bascianus de duritia quicquam imminuisset: simul Valerius à Basciano accersitus interrogatur, an probaret diei superioris edictum de obsidionis sumptibus repræsentandis. Cui Valerius capitis diminutionem obiectās, ostendit nullam se posse sentētiā dicere, nisi quam iussus esset, scēque cum libertate castri præfecturam

& imperium amisisse, parūque referre, Bascianam
sanctionē probaret, an improbareret, quum amplius
nullus sui respectus haberetur: si tamen adhuc sibi
quicquam iuris reliquum esset, impelli se nunquam
posse, ut cēderet aut suaderet aliam deditiois legem
subeundam, atque legatorum pactionibus conue-
nisset. Ne hæc sententiæ constantia ad obsessos per-
lata, eos ab instituto consilio deterreret, rēque ad
pristinam belli rationē reuocaret, pauca Bascianus
cum suis colloquutus, eadem vsus simulatione de
omnibus liberādis, huic dexteram prehendit, atque
arridens, Nunc, inquit, extra omnem exceptionem,
pollicita confirmamus diuturna obsessiōe, & ani-
mi suspensione languentes tandem ad libertatem
euoca. Valerius semel deceptus, fluxæ fidei parū cre-
dens, hanc in se prouinciam non recipit, sed vocato
inclusorū nuntio, Huic, inquit, here quæ iubes, præ-
cipe, imperio fortuna me deiecit. Quod ergo per
Valerium facere non potest Bascianus, per nuntium
exequitur. Illos aduocat, eisque nihil nocitum iri fi-
de sua esse iubet, atque per caput Solimani deierat.
Nuntius hac onustus vanitate, ad suos properat, &
nūtiū effundit. Hoc audito, metu se milites expe-
diunt, ac lætitia gestientes exitum parare incipiunt.
Quūque Equites consideratius exitum fieri oportere
pronūtiassent, milites quicquid temporis inter-
cederet, hoc libertatem suam morari & impedire
arbitrati, cōcursu ad portas factō, conferti cum vxoribus
& liberis, castro se præcipites agūt. Hostes tur-
matim ante portas dispositi, ut emigrantes excipe-

28
rent & deprædarētur: id faciunt, omnibŭsque rebus,
quas quisque chariſſimas abſtuliffet, expoliatos, præ-
da loco ad naues abducunt. Mauros ducētos, qui, ex
quo tempore Tripolim Equites adepti fuerant, ho-
rum fidem ſemper erant ſequuti, interficiunt. pars
Equitum expoliata, ad Baſcianũ deducitur, reliquis
ad naues abreptis: quibus viſis Valerius Baſciano fi-
dem obiicit: ſed hic cum canibus fidem ſe non cole-
re reſpōdet: tãmq̃ ſibi liberum eſſe promiſſa non
exoluere, quã illis fidẽ Solimano Rhodi iurata
fefelliſſe. Hoſtes caſtro potiti, acclamationibus, ſuo
more, & cannarum ſtrepitu in cælum editis, victo-
riam cōcelebrāt. Huc Aramo accedit, & Equites hu-
mi proſtratos inſpectās, miſericordia commotus, ad
Valerium procedit, eũque quibus poteſt verbis ex
tempore cōſolatur. Hoc peractō, fidem à Baſciano
violatā intelligit, & obnixè rogatur, vt ab eo conten-
dat, ſi fidem integrè non ſeruaret, numerum tamen
à ſe præſcriptum impleret. E ducentis, quibus initio
pactionum vltro miſſionem ſpononderat, perpau-
cos vinculis exemerat. Aramo huic operam ſuam
profeſſus, ad Baſcianum ſe confert, narrat quæ de fi-
de non ſeruata Valerius opponeret. Hic item fide ab
Equitibus Solimano fracta ſe protegit. Vix tandem
obtinetur, vt ducētis catenæ demerētur. Quinetiam
vt ad Goſiram factum demonſtrauimus, ſenio con-
fecti, & ad rem gerēdam inutiles abſoluuntur, equi-
tibus Hispanis aſſeruatis, aliquot Francis adoleſcen-
tibus admixtis. Qui vt vinculis ſoluerentur, pecunia
Baſcianum Aramo expugnauit, atque illos ſolutos

suis nauibus imposuit. Ad portus introitum, medio-
cri ab arce interuallo, olim Cæsariani post urbem à
se captam turrim excitauerant. hæc vni ex Francis
equitibus triginta militū præsidio custodienda com-
missa fuerat. Hostes, castro potiti, hanc etiam quum
expugnare pararent, ad easdem artes, quibus Vale-
rium fefellerant, confugiunt. sed is eorum fidei mi-
nimè confusus, rem consultò tractandis conditioni-
bus extrahit, dum nauculam nanciscitur, in quam
vniuerso contubernio imposito, ad Aramonis naues
perueniret. His rebus gestis, Aramo facta potestate,
naues soluit, & Tripolis reliquias Melitam traiecit.
Harum appulsu, casu Tripolis cognito, & cum Gosi-
ranorum perniciæ collato, Omedes animo grauius
laborare cœpit, & rationem inire quo modo iis de
rebus Cæsari se purgaret, vt culpa vacare crederetur.
hunc verò quæ angebat ratio potissima erat, quòd
annis superioribus, quum relatū esset, Cæsar, te nol-
le Tripolis custodiam Equitibus remittere, indictis
& peractis comitiis solennibus, omnibus cautioni-
bus sancitum fuerat, vt reliquis curis posthabitis, in
vnam rem Tripolitanam incumberetur, & statim ac
per opportunitatem liceret, eò militia transferretur:
interim quotannis equites quinquaginta transmit-
terentur, donec ad vniuersitatem deuentum esset:
quod tamen Omede prohibente fieri non potue-
rat: Pontificis maximi beneficio concessum est mi-
litæ principibus, vt singulis quinquenniis, cuiusque
prouinciæ definitas possessiones vacuas, quibus vi-
sum sit commendare, & ab eo qui fuerit auctus ea li-

beralitate, anni vnus prouentum exigere. Hac tamen lege id est impetratum, vt exactam pecuniam ex æquo Princeps cum ærario partiatur, & æqua pars in castrorum munitionibus collocetur. Nouemdecim prouinciis militiam cōstare planum est, triaque post initum principatum quinquennia Omedi affluxisse, quibus & rem suam familiarem genūsq̃ auxit amplissimè, & facultates magnas ærario fraudato comparauit, domūmq̃ auertit. Ei rei Tripolitanæ munitiones magnum impedimentum attulissent: sed ne, Cæsar, ipsi Tripolitanum excidium ascriberes, hoc ille modo præcurrendum esse putauit. Familiaribus aliquot nominatim euocatis, & in cellam ædium occultiorem retrusis, quòd aliis præsentibus sermones suos iactari nollit, grauius apud eos factū suum queritur, quòd Aramonis animo non ita probè sibi perspecto & cognito, hūc tamen ad Turchas allegasset, qui tametsi à militiæ rationibus alienum animum non gereret, erat nihilominus sola præsentia deditionis causam præbiturus: quòd inclusi nauium eius subsidio confisi, erant contentionis pertinaciam & studium deposituri. Quinetiam credibile esse, Aramonem suæ gētis fœdere cum Tucharum natione, rerūq̃ communicatione sollicitatum, Valerio Franco defectionis autorem fuisse, atque ita eius alacritatē repressisse. (cuius torpore & tarditate milites adducti, ad deditionis condiciones descendiissent) hoc percōtationibus elici & sciri posse. Etenim omnibus mirum videri quinque omnino diebus, quibus eò ventum sit, arcem validissimam ex-

pugnatam esse . Hoc seu diceret , quòd fraudem admissam esse crederet , seu verecundia ductus , quòd despecto concilii iudicio maturè Tripolis periculo prauertere recusasset , quoniam compertum non habeo , pro certo ponere nolui . Qui ei sermoni interessant , vt se assentiri comprobarent , de suo quisque addit , quæ ad rem pertinere arbitratur . denique rationationibus in multam noctem extractis concluditur , in Valerium quæstionem decerni oportere : sed hoc negotium in Aramonis discessum esse differendum , interim dum ipse nauibus portum occupat , clausis castri ianuis toto muro custodias diffundi , ne quid clàm cum Francis commolitus , ex insidiis castrum occuparet . Hæc occultè structa techna serpere cœpit latius , atque alteri ab altero quasi per manus tradita certo autore occultato , quum plures autores esse viderentur , ac de suo quisque semper aliquid adderet , sic aucta est , vt castri muniendi causa animo dissimulato magnus postridie ad Omedē Equitum & militum fieret concursus . Hæc ad Aramonem amicorum indicio peruenerant . istamen animi cōscientia & domestico fretus iudicio , in concilium se cōferre deliberat , vt redderet à se susceptæ procurationis rationem . Adeuntem Omedes magna hominum frequentia excipit , & iuxta se assidere facit . Tum Aramo exponit , vt suprà ostendimus , de castro expugnando quæ Bascianus à Solimano mandata habuisset , & , vt hunc ab instituto deduceret , quantum ipse conatus esset : quidve responsi abstulisset . deinde eius perfidia memorata , asserit se om-

nino assequi non potuisse, vt alia lege, qui in vinculis erant Equites, absoluerentur, quàm vt triginta, qui ad Melitam intercepti fuerant Turchæ, itidem libertate donarentur: cuius rei à Valerio promissæ Equitum precibus fideiussor extitisset. Proinde rogare vt apud se bona fide deponerentur, ne Bascianus de eo queri posset: multa addit ad Equitum excusationem, debilitati loci culpam calamitatis attribuens. Qua oratione suam indiligentiâ tangi Omedes suspicatus, paucis, & subfrigide agit ei gratias, & confestim spe recipiendorum captiuorum repellit ad Valerium & socios hac excusatione reiectū, quòd captiui præda eorum essent, à quibus capti fuerant: nec aliter haberi eos posse, quàm pecunia redēptos. Misso ad vesperam concilio, qui pridie secreti fuerant participes, in conclaue ab eo seuocantur. vbi de suspicionibus & ratione perficiendi plenius agitur & liberius: sed de Francis laboratur, qua arte capi possint, vt dolos non sentiant. hæc enim natio numero plurimum valet, quæ si illorum proposito aduersa fuisset, magnam difficultatē attulisset. In eam rem hic munitur aditus. Homines idonei deliguntur, qui viros primarios singulatim prensent & doceant, nisi in dedititios summa seueritate exemplum ederetur, quantum militiæ dedecus allatura esset Tripolis deditio. Francorum nationem sic semper meruisse, vt nullam vnquam ignominiâ sustinuerit. Nunc verò magno Reipub. Christianæ detrimento accidisse, vt qui Tripolis imperium obtinebat Francus, relicto loco sibi demando, ab hoste vo-

catus, paruerit: quo ex facto arcis deditio sequuta sit. Quum in primis laudi studeant Franci; eorum esse hoc acrius instare, vt causa cognita de eo statueretur: ne ea parte neglecta aut impedita, admissæ turpitudinis consciû fuisse crederentur. Rem concionis arbitrio permittere, vnicum ad omnem tollendam suspicionem esse remedium, vt si necessitate, quod quidem credibile est, locum desertum fuisse constitisset, desertores optimatum sententiis absoluerentur. His rebus ita concinnatis, primùm inuaduntur aulici, quòd Omedis gratiam præ cæteris omnibus rebus sectari crederentur. hi capti laudis imagine, & pollicitationibus circumuenti flectuntur, vt se principes fore ad Valerii noxam persequendam profiteantur. Qui apud eum ordinem Fræcorum nomine appellantur, diligentia laudem reliquis præripiunt, procurant vt suorum prouincialium concio indicatur. Quumq; permulti conuenissent, & princeps eorum non adesset, quæritur à senioribus quò impulsore, & qua de re coiuisset. Ad hoc quum nemo respondisset, re infecta congregati, dilabi è concione incipiebant: sed illi quæ sita & illata causa recedentes retinent, & cæteros festiuos, & iocis intentos, vt cuiusque natura & ingenium ferebat, ad excidii Tripolitani mentionem conuertunt. Commemorant edicto principali statutum esse, vt vniuersæ prouinciæ generatim cogerentur, & vnaquæque certum quempiam deligeret, qui Valerium Tripolis desertorem ad supplicium deposceret. non sibi committendum esse, vt postremi ad eam rem

fuisse dicerentur, ne desertionis crimen protegere videretur. Hoc vniuersi non probant, quod accusationes eiusmodi & expostulationes ad actorem publicum potius pertineant: essetque adhuc inauditum, Equites suo nomine communere functos esse. Huc tamen vario sermone peruenitur, eligi certe posse, non qui actoris partes impleret, sed qui ab Omede postularer, ut Valerium in concilio causam dicere cogeret, cur hostibus cessisset, locumque dereliquisset. hoc quidem summis precibus Valerium concedere, sed ei minime responderi. Rem nouam non temere tentandam esse: Francorum nationem ab omni criminis suspicionem semper integram extitisse: quam laudem non omnes reliquae nationes possent usurpare. Rhodi contigisse, ut ex Hispanis vnus proditoris insimulatus, eoque nomine damnatus, poenas daret. non fortasse fore omnibus iniucundum, Francos famae iactura Hispanis exaquare: secundum hanc sententiam suffragiis adlegitur qui deliberata ad Omedem perferat. Hoc ille audito Francorum diligentiam pluribus extollit verbis: verum id negotium in Aramonis discessum prorogat. Aramo rem frumentariam expediebat. cui rei insumpta tridui mora, ab iniquis dicebatur consulto tempus extrahere, dum Turchae aduertarent, ut rem Melitanam cum Tripolitana coniungeret. Post eius profectionem, Omedis praeepto, nationes generatim congregatae, singulos accusatores nuncupant, qui desertionis crimine Valerium arcesferent, & poenas expeterent. Hoc autem causa cognita fieri, petentibus Francis, Octauii Fernelii exem-

plum de Colorgnæ arcis præfecto opponitur. quem post arcem amissam Fernesius ad suspendium indicta causa adegerat. Auditis omnium exposculationibus decernitur, vt Valerius, & qui assensu cōsiliū eius cōprobassent, causam dicerent è vinculis. Quæstioni tribus equitibus nominatis adiungitur Augustinus Combis Melitensis, quem ex intima fortuna & vili plebe ad honestum dignitatis gradum Omedes euexerat. Qui actoris publici officio fungeretur, & in reos testes constitueret, ac delegatos instigaret, ex Omedis animo conquisitus Hispanus præficitur. Hoc vrgēte Valerius in vincula coniicitur, Cæsarææ ditionis Equitibus armatis vndique confluentibus, & ne spiculatoris manus effugeret, simul carceri custodes admouētur. Iam non vt prius vlla modestia, sed aguntur omnia raptim atque turbatè: palāmque Valerius proditionis insimulatur. Franci, etsi hanc in se calumniam cudi perspiciebant, armis tamen ius suum exequi volebant: ne diceretur eorum contentio huc spectasse, vt res examini demandata & permissa, testibus non conficeretur. Cum Piglino Itolorum duce vetus Villagagnoni intercedebat amicitia necessitudo. Is Piglinus, quod ære alieno plurimum premeretur, militiæ legibus à dignitatibus arcebatur: réque in cōtrouersiam adducta, quem nunc tenet dignitatis gradum, ab Omedis liberalitate acceperat. ob quæ merita & ei plurimū fudit Omedes, & propter amoris affectum plurimum tribuit. Villagagno antiquam suam cōsuetudinem satis esse causæ ad eum adeundum iudicans, docet quàm inso-

31
lenter, quantoque seditionis cum periculo gesta res
esset: visos fuisse qui non solum Valerium male ha-
berent, sed etiam Regem, eiusque Legatum probris
essent infectati. Hoc quoniam est ab omni ingenui-
tatis & honestatis officio alienum, priusquam res ma-
gis ad perniciem inclinaret, ab Omede reprimi de-
bere. Quumque apud eum gratia tantum posset,
cumque amicitiae locum teneret, petit, ut pro sua in
Francos beneuolentia, & publica concordia, in hac
rem, suam auctoritatem interponere non grauetur.
Afferebat insuper Villagagno multas sui iudicii ra-
tiones, cur in Valerium decreta improbare: quarum
haec erat iustissima, Quum castelli infirmitas militi-
bus timoris causam praebuisset, atque hinc accepta
calamitas prorsus emanaret, tamen in Equites, qui-
bus ad virtutem nulla res defuerat, omnis ignomi-
nia intactis militibus deuolueretur, praestare, ut
res esset, sic euulgare, quam Equitibus, viris fortissi-
mis, labem turpitudinis immeritam inurere. Etenim
munitionis imbecillitatem & vitium, aerarii tenui-
tate & paupertate excusari, at iniustam Equitibus ma-
culam elui nunquam posse. Neque etiam accideret
quin principum Christianorum animos in Equites
hoc factum irritaret, Regis praecipue: quod sibi suaeque
genti per calumniam & fraudem tantam infamiam
irrogari grauiter laturus esset: simul Caesarem, qui suo
nomine iam Francos odisset, perfidiae delationibus
aurem libenter accommodaturum, eaque oblata cau-
sa odio maiore in eos exarsurum. Quorum princi-
pum iracundia, ut erant militiae res inter se commu-

nes & confusæ, cōmuni quoque damno erat omnes
pariter affectura : neque vni parti noceri posse, quin
id alterius fieret incōmodo . Piglinus, vbi amissi ca-
stelli culpam in desidiosam & inertem administra-
tionem, aut per auaritiam opera negata auerti sensir,
hoc telum in Omedem intendi cōiectura colligēs,
iracundiam non tenuit . Illum quoque veteres ini-
micitia ex iudicialis controuersia molestia susceptæ
incitabant . Post Rhodi cladem, vsque ad Omedis
tempora triremium imperii summa ad Italos respe-
xerat, vt diutina possessione, quasi suo iure hoc ho-
noris sibi vendicarēt: atque vetante & contradicen-
te Omede quæsitum esse defenderent . Re ad Pon-
tificem delata, multis vltro citroque expositis ratio-
nibus agente Valerio, & Romæ ob eam procuratio-
nem confidente, Itali causa ceciderunt . huius dili-
gētia memoria & incommodo Piglinus vehemen-
tius incendebatur, & hac temporis opportunitate
spem doloris vlciscendi oblatam è manibus amitti
dolebat, vt in has voces ferretur, Non (inquit) ei cul-
pæ, cui tu cladē impingis, sed vni Valerio acceptam
feras. Tum apud suos glorians, Nos Rhodi muros
penè deiectos, vrbe etiam capta dimidia, obiectis
tamen cratibus ac paucis sudibus animo infracto
defendimus: si sic faciēdum Valerius sibi proposuif-
set, nunc tanto nostro incommodo hostes castro
non potirentur. sed hic nonnulla spe fretus, hostem
ad colloquium asciuit, & fortuna pugna non tenta-
ta, turpiter se dedit . In hunc animaduerti necesse
est, si Cæsari, ad quem maximè pertinet cladis incō-

modum, velimus esse purgati. Huic respondet Villagagno, quòd Rhodum penè euerfam, fortissimè tamē defensam esse obiectaret: ea re militum virtutem & animi constantiam patefacere. At Equitibus ad Tripolim longè aliter euenisse, qui à militibus destituti, vix ad triginta redacti, hostibus pares esse non potuissent. Quod verò de satisfaciendo Cæsari subiceret, à se non improbari, si modestia & æquitas adhibeatur: sed insontem pro noxiis poenas dare, aut qui per ignauiam & animi imbecillitatem offendisset, proditoris crimine damnari, rem esse improbi & iniqui iudicii: atque adeò hoc iniustioris, quòd ex Aramonis Legati præsentiâ conficto crimine, Regis quoque optimi, optimè de militia meriti, existimatio laderetur. Hoc responso Piglinus excandescens, ad iurgium se comparabat: cuius rei vitandæ causa inde Villagagno se subduxit. Iam rumoribus percrebuerat Iulium Pontificem & Cæsarem iunctis copiis Parmam & Mirandulam obsidere, atque Henricum Regem bello laceffere. hinc occasionem nonnulli captantes, quoquouersus dimissis literis, exponunt Aramonem Fracos Tripolis imperio præfectos corrupisse, vt ex conuento Turchis arcem proderent: ipsumque postea Melitam rediisse, vt hanc similem ad casum adigeret: Omedem de proditoribus supplicium sumere conatē, à Francis clausum & obsessum teneri. Hæ literæ in vulgus editæ, maximi ad odia in Francos excitanda momenti fuerunt: adeoque res processit, vt per imperii prouincias, Fracum

aliquem dici, ad supplicium satis esse causæ credere-
tur. Eas imposturas fouebat iudicii in Valerium con-
stituti formula. Omedes grauib. pœnis edixerat
nequis ante sententiam pronuntiatam pro Valerio
supplicaret, aut eius causam ageret: sed in eum cu-
iusque generis testes admitterentur, neque vllus es-
set famæ respectus. Atque vt maior esset ad struen-
dam calumniam licentia, violatis legibus, obtinetur,
ne dicturi testimoniū reo præsente iurare cogeren-
tur, nèue lato testimonio reuocarentur, vt id repete-
rent atque confirmarent. Præterea siquis, quod cum
eo priuatas gereret inimicitias, aut alia causa à iudi-
cio legibus arcebat, ille de hoc supplicans, expulsus
tamen propter beneuolentiæ opinionem nonnul-
lis, reiicitur. His rebus actor publicus confirmatus ad
facinus audendum impellitur. Ex omnibus qui Tri-
poli fuerant exportati, paucorum egentium & per-
ditorum delectum habet, eosque doctos quid pro
testimonio dicendum esset, pollicitationibus ad id
ferendum perlicit. Dominicus Cubillanus, Hispanus,
cui aliquando falsi damnato brachiis post ter-
gum religatis præcipitii pœna erat irrogata, testis co-
optatur. Vanegas item Hispanus, qui abiurata reli-
gione, filios matrimonio susceptos vendiderat. Præ-
terea cannarum magister, ad hostes transfugiens ex
itinere reprehensus, eoque nomine condemnatus,
Valerii clementia mortem effugerat, alique eiusmo-
di aliquot ad testimonium dicendum coacti, affir-
mant lenunculo noctu ad arcem appulso, secreta

colloquia cum Valerio Turcham habuisse, ac die
postero Valerium Cauaglione, quem ad hostes
transfugisse demonstrauius, cum argenti mune-
ribus ad Bascianum misisse, arcemque biduo post
hostibus tradidisse. Sed quum de rerum temporibus
& ordine interrogarentur, tam perturbatè & variè
quæ docti erant effutiebant, ut sua sponte vanitas appa-
reret. Villagagno ubi animaduertit talibus testibus
quæstionem haberi, iudices datos Equites conuenit.
his ostendit sui esse officii, si refellendorum testium,
quæ omnibus esset facultas, Valerio negaretur, ut ip-
si nullos nisi integræ famæ testes admitterent. Re-
spondet reorum litem suam se non facturos, suum-
que officium his finibus contineri, ut quos actor pu-
blicus testes produceret, interrogarent. ille usu eo-
rum testium fretus, & Omedani edicti licentia qua-
tuor insuper testes subornauerat, quibus probaret
Aramonem, canis in terram emissis, arcem cum
Turchis, pariter concussisse, idque ex vexillis regis
deprehensum esse. veruntamen quum stulta testium
loquacitate fraus effluxisset, iniquitatis & calumniæ
pudore victus sese continuit. Testibus eius officio
functis, reorum testibus adducendis & audiendis
octo dies indicuntur, quauis actori publico duo ces-
sissent menses. A Equitate tamen causæ perfectum
est, ut sexaginta virorum integrorum testimonio
reorum innocentia confirmata sit. his de rebus pau-
lò post ad concilium refertur, & testificata recitan-
tur. Magna quippe videbantur quæ actoris testes af-

ferebant. sed iis, quæ sunt adductæ, rationibus est fides abrogata. Itaque omnium ad vnũ iudicio pronuntiatur, in deditione Tripolitana neque dolum, neque fraudem, aut vllam penitus malitiam interuenisse: sed animorum nimia remissione è timore nata, peccatum esse. quo nomine nullum in eos legibus Imperatoriis supplicium esse constitutum, à iudicibus datis ostenditur. sed Equitum sanctionibus caueri, vt qui hostibus cesserit, locumue sibi commissum iniussu principis reliquerit, quique desertionis participes & conscii extiterint, concilii arbitrio exaugurentur. Hac lege cum Valerio Sossam Lusitanum, Herreram Tarraconensem, & Fustum Maioricarum noxios pariter deprehensos vnum & idem supplicium luere oportere. Ex qua lege, Omedes Hispanos communi cum Valerio pœnæ destinari intelligens, & Poesium, cui ob vetus odium pessimè cupiebat, omnium sententiis eripi, è temporis exiguitate sumpta occasione causam diuidere conatur, atque in præsentia Valerio damnato, Hispanos ad aliã opportunitatem reseruare. Hoc probare incipit Combus, qui Quæstoris vice functus erat, & ex Omedis animo sententiam corrigere, magnæque animi contentione Hispanorum culpam extenuare. qua versutia Schilingus Germanus permotus, Tu, inquit, homines improbus qui te tam leuiter inflectas. tu nunc affirmabas, quum vnà & æqualiter omnes deliquissent, non posse admissum scelus expiari, nisi pœnas pariter penderent: at è vestigio ad leuem principis

propositiunculam te immutasti. tu sanè ipse maximo cruciatus dignus es. Ad hanc sententiam Perus Nugneus eques Hispanus accedit, atque adiungit, Tu, ut rei nullius hominem decet, eloquutus es. tum ab hoc conuersus ad Omedem, se non passurum esse pronuntiat, de Valerio decerni, nisi qui eadem culpa essent obstricti, idem quoque subirent iudicium. Reliqui, Combo conuitiis grauiter correpto, in Nugnei sententiā pedibus iuerunt. Tandem quum altercatione, nulla Omedi spes euasionis esset, reliquorum sententiis se accommodat. Addit tamen atque instat, de Valerio & Fustero aliquanto grauius esse statuendum, quòd hic illius postulata ad hostes pertulisset: ille ab hoste vocatus, paruisset, locumque fidei suæ creditum deseruisset. sed quia religione à capitis iudicio arcentur Equites, laicorum arbitrio exauguratos relinqui oportere. Atque ad eam rem iudicem proponit Combum. hic verò, his de causis quæ de ipsius leuitate demonstratæ sunt, non probatur: quanuis acriter Omedes contrà insisteret. sed ipse pudore victus, onus excutit, hoc prætextu quòd iam partibus iudicis functus esset, atque sententiā suam declarasset. Qua demonstratōne Omedes non contentus, rem ad Scribam reiicit, atque ita concilium dimittit. Breui tempore interiecto, in hanc sententiā literas à Rege nuntius attulit, Quoniam multorum sermonibus comperisset suam famam de re Tripolitana per exteras nationes traduci & conflari, & ea de re Melitenses omnium certissimum

testimonium ferre possent, pro suis in eos perpetuis
meritis postulare, vt ad se rem verissimè perscribe-
rent, vt siquid Aramo peccati concepisset, aut omni-
no rem Legato Christianissimi principis indignam
conatus esset, sceleris pœnas daret. si verò nihil per-
sona, quam sustinebat, indignum fecisset, publico
militiæ testimonio inusta priuatis scriptis macula
detergeretur. Literis in concilio recitatis, & postula-
torum æquitate perspecta, statuitur, Regi quod pe-
teret, concedi oportere. siquidem in Aramone nihil
culpæ deprehensum erat: sed cum potius maxima
pietatis officia, tum regio, tum proprio nomine præ-
stitisse. Atque ea de re arctissima obligatione mili-
tiam ipsi deuinctam esse ad vnum omnes ingenuè
confitentur, in eamque declarationem Scribæ lite-
ras imperant. At Omedes misso concilio hunc ad se
venire iubet, & aliquantum temporis supersedere,
dum de ratione conficiendarum literarum consi-
deratius deliberatur. Eas tanti ac talis momēti emit-
ti non debere, nisi optimè digestas & concoctas.
Quum ad scribendum satis temporis effluxisse Vil-
lagagnoni visum esset, à Scriba literas requirit. Ille
verò magnis quibusdam occupationibus tarditatem
suam tegit, atque in diem sequentem extendit. Ea
mora intermissa, iisdem quibus vsus antè fuerat arti-
bus, diem extrahebat. Quam prolationem Villaga-
gno non absque ratione fieri arbitratus, inquiren-
dum esse putauit, quid aleret hoc mali. Id quum fe-
cisset, reperit cum Combo Omedem secretò de re

Valerii diu loquutum esse, eique cunctanti quingen-
torum aureorum pœna constituta edixisse, vt illius
iudicium susciperet, atque si vsus esset, cruciatibus
extorqueret, Aramonem secum de castris deditio-
ne transgisse per hominem noctu missum, vt
hoc expresse, & in acta redacto, æquissima Regis
postulata criminis confessione deluderet. Ea re Vil-
lagagno prouocatus, coacto concilio, Scribæ negli-
gentiam accusare cœpit, quod serius quàm ipsi præ-
scriptum esset, literas cōficeret. siquid obstaret quo-
minus hæc darentur, omitterentur: ne moræ illatio-
ne ab idonea ad nauigandum tēpestare in hyemem
Regis nuntius produceretur. Regem fore conten-
tum declaratione secundum reos facta: hos, neque
dolum, neque fraudem in tradendo Tripolis castro
commisisse, sed per ignauiam oppressos formidine
hostibus cessisse. Cum ipso hæc dicente altercari cœ-
pit Laboretus Eques, Aquitanus, Omedanæ gratiæ
sectator, à Rege testimonium Aramonis innocen-
tiæ petatum solum esse, non autem in reos dictata.
Villagagnonem respondere exorsum Omedes in-
terpellat, ad quem ipse conuersus, Vt, inquit, Prin-
ceps, intelligas quibus causis adductus iudicium pro-
nuntiata efflagitauerim, consilii mei rationem, si per
te mihi licuerit, paucis expromam. Iam percrebuit,
tibi cum Augustino Combo conuenisse, vt is in Va-
lerium capitis iudicium aggrediatur, tēque ei præ-
scripsisse quid ab eo inquirat: atque si Valerius diffi-
ceatur, id tormētis exprimat & exculpat. Hanc tuam

cunctationem, moramque literis interiectam, huc pertinere plarique arbitrantur, vt specie probabili illata causa Regem postulatis deiicias. Etenim Valerius, præter ætatem in multum senium prouectam, est ea corporis habitudine, & virium imbecillitate, vt ab ipso quæque vanitas facile pro re vera tormentis extorqueatur. Vbi arcanum Omedes proditum esse sentit, ira correptus, Villagagnonem increpat, iubetque patefacere à quo hæc accepisset. Is autoris nomen minimè quærendum esse, sed an verum esset indicium, respōdit. Hoc quum Omedes falsum esse pronuntiaffet, Ergo Combum, inquit Villagagno, absolue, Princeps, quingentorum aureorum pœna ipsi à te irrogata, nisi capitis iudicium in Valerium à te constitutum susciperet. Ipse in tuo concilio ignominia notatus, quòd in ferenda sententia parum sibi constitisset, non amplius est rogandus, sed arcendus, atque eius loco alter integræ famæ, si rem rectè iudicatam velis, furrogandus. His dictis, ira simul & pudore Omedes æstuans, verbis in Villagagnonem irrumpere incipiebat. Sed ille eius rei vitandæ gratia è concilio se recepit. Eò tamen res rediit, vt alius à Combo iudex Valerio fuerit datus, ac Scribæ imperatum, vt nulla mora interposita testimonium cōscriberetur. Sed hoc ita fabricatum est, vt reprehensioni locum relinqueret. Nam vbi assertum esse debuerat, Aramonem nihil prorsus contra viri boni officium fecisse, id definito tēpore, & quodam verborū aucupio coarctabatur. In eum nem-

pe diem compertum non fuisse, hunc fecus ac virum bonum decuerit, se gessisse denuntiabatur, perinde ac si eius rei certitudo diuturnitati temporis referuaretur. Itaque huiusmodi testimonium delatorum se esse Villagagno negat, quod dubitationem non tolleret, sed hominum animos futuri temporis expectatione suspenderet. De hoc iterum ad concilium refertur, atque Omedi vehementer reclamanti expugnatur, ut literæ omni dubitationis adempta materia reficerentur. Harum exemplum in Franciam mari proficiscens Villagagno, à tuis, Cæsar, interceptus, ad te misit. De Valerio autem contigit, ut is à Iohanne Vassallo, doctissimo atque integerrimo viro, modis omnibus renitente Combo, absolutus sit: quòd dolum fraudemque ab arcis deditio-
ne abfuisse cognitum & perspectum esset, sine quibus causis Imperatoriam maiestatem non posse lædi Iulius Cæsar lege promulgata definiuit. Hic tamen carcere conclusus subterraneo, cæco, atque solis, omnisque lucis prorsus experte, miserrimam & inopem vitam ab Omede bonis omnibus expoliatus traducit: vsque eò, dum tu eius ærumnas miseratus, Omedis mentem ad lenitatem & misericordiam reuocaueris.

Hic fuit belli Melitensibus illati exitus. Nunc tuum ac bonorum omnium, Carole Cæsar, erit iudicare, ad quem arcium deditarum dedecus pertineat: quàmque iniqui & improbi fuerint, qui eam cladem in Francos auertere sunt conati.

EXCVDEBAT CAROLVS STEPHA-
NVS, TYPOGRAPHVS REGIVS,
LVTETIAE, M. D. LIII.
CALEND. APRIL.

